

Ucapan Penangguhan Majlis Mesyuarat Negara Tahun 2024

بِسْمِ اللَّهِ الرَّحْمَنِ الرَّحِيمِ

الْحَمْدُ لِلَّهِ رَبِّ الْعَالَمِينَ، وَبِهِ نَسْتَعِينُ عَلَى أُمُورِ الدُّنْيَا وَالْآخِرَةِ،
وَالصَّلَاةُ وَالسَّلَامُ عَلَى أَشْرَفِ الْأَنْبِيَاءِ وَالْمُرْسَلِينَ، سَيِّدِنَا مُحَمَّدٍ وَعَلَى آلِهِ وَصَحْبِهِ أَجْمَعِينَ.

السلام عليكم ورحمة الله وبركاته
والسلام على من اتبع الهدى

Yang Berhormat Pehin Yang Dipertua,

Dengan rasa penuh kesyukuran atas ni'mat Allah *Subhanahu wa Ta'ala* kepada kaola sempat lagi menyertai Yang Berhormat Pehin dan rakan-rakan Yang Berhormat sejawatan serta juga Yang Berhormat sahabat-sahabat sepermesyuaratan dalam Persidangan Majlis Mesyuarat Pertama Dari Musim Permesyuaratan Ke-20 Majlis Mesyuarat Negara (MMN) Bagi Tahun 1445H/2024M.

Kaola seterusnya mengucapkan tahniah kepada Pehin yang memang diketahui berkewibawaan memimpin sesi-sesi permesyuaratan Majlis ini. Iaitu Majlis Mesyuarat Negara yang merupakan medan untuk melahirkan pendapat dan buah fikiran yang membina oleh para Ahli sebagaimana disebut dan direkodkan sebagai titah Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah Ibni Al-Marhum Sultan Haji Omar 'Ali Saifuddien Sa'adul Khairi Waddien, Sultan dan Yang Di-Pertuan Negara Brunei Darussalam, sempena Majlis Pembukaan Rasmi Mesyuarat ini pada hari Selasa 17 Sya'aban 1445H / 27 Februari 2024M.

Dalam kontek itu Baginda juga menyatakan bahawa Majlis ini dihasratkan kekal relevan untuk membincang perkara-perkara strategik yang bermanfaat bagi rakyat dan negara.

Alhamdulillah Yang Berhormat Pehin, kaola memahami dan menyifatkan titah Baginda itu adalah pada menyatakan bukan sahaja harapan bahkan keyakinan Baginda tentang relevansinya Majlis Mesyuarat Negara ini yang ditubuhkan semula di bawah *Perkara 23 – Perlembagaan Negara Brunei Darussalam (Pindaan), 2004*. Dan dalam konteks itu Baginda menyatakan bahawa “Perlembagaan juga akan menyediakan lebih banyak peluang bagi rakyat untuk melibatkan diri dalam perundingan serta menyumbang secara membina kepada kemajuan negara,” yang mana Baginda seterusnya bertitah bahawa “Perkara sedemikian akan lebih mengukuhkan sistem kerajaan serta perpaduan di antara kita”.

Yang Berhormat Pehin Yang Dipertua, kaola menghubungkan kaitkan titah sempena perasmian Majlis Mesyuarat Negara tahun ini dengan titah Baginda sempena Majlis Penandatanganan Pemasyhuran Perlembagaan Negara Brunei Darussalam (pindaan), 2004 itu dalam sesi Ucapan Penangguhan ini ialah dengan maksud supaya kaola dan rakan-rakan Yang Berhormat sekalian yang berada dalam Dewan ini dengan masing-masing kapasiti adalah untuk menjayakan harapan dan keyakinan Baginda dengan memastikan relevansi MMN ini untuk seterusnya berkembang ke arah kemajuan negara dan menguatkan lagi perpaduan di antara kita.

Kaola menyebutkan perkataan *kita* adalah bermaksud kerajaan berpemerintahan beraja yang bijaksana dan berwawasan *Adil Berdaulat Memimpin Rakyat Menaungi Nusa* dengan sekalian rakyat yang taat setia berusaha dan mendoakan semoga *Ilahi Selamatkan Brunei Darussalam*.

Dalam memanfaatkan kapasiti masing-masing untuk mengembang majukan negara dan menguatkan lagi perpaduan negara kita setentunya akan bijak menyampaikan *signal*, isyarat sampai di luar Dewan ini kepada rakyat dan orang ramai bahawa MMN adalah sebahagian lembaga pemerintahan negara yang dinamik, tidak statik, namun akan sangat berhati-hati berkembang menurut tahap-tahap yang sehat berkebijakan, selamat dan aman, dengan sentiasa berpaksikan perpaduan di antara kerajaan berpemerintahan beraja dengan rakyat seperti sifat dan hakikatnya yang dinyatakan itu.

Dalam hubungan ini, Yang Berhormat Pehin Yang Dipertua, pada hemat kaola sistem berpemerintahan negara kita sebagaimana menurut Perlembagaan adalah sudah *syari'ah compliance*. Kerana itu kaola tidak ragu untuknya berkembang dengan semangat *musyawarah* seperti yang jelas ketara dalam peruntukan-peruntukan di dalamnya.

Mengenai perkara ini kaola menaruh harapan agar pusat-pusat pengajian tinggi negara ini akan berperanan memberikan kefahaman ilmiah meliputi undang-undang dan sejarah ketata-negaraan meliputi sudut-sudut kenegaran Brunei kita, negara Melayu Islam Beraja yang merdeka berdaulat demokratik bersendikan agama Islam menurut ajaran Ahlis Sunnah Waljama'ah dengan mengajarkan ilmu ketata-negaraan iaitu undang-undang perlembagaan dan syari'ahnya beserta sejarahnya, tidak semata-mata semboyan tentang Melayu Islam Beraja tapi lupa bahawa ia adalah negara berdaulat merdeka demokratik bersendikan ajaran Islam menurut Ahlis Sunnah Waljamaah yang seolah-olah. Huraikanlah demokratiknya itu secara ilmiah.

Yang Berhormat Pehin Pengerusi, kaola ingin menyebut ringkas mengenai peranan yang boleh dimanfaatkan oleh pihak-pihak eksekutif iaitu Kementerian-Kementerian daripada keahlian Ahli-Ahli Yang Berhormat Yang Dilantik menurut kategori masing-masing, sebagaimana juga diisyaratkan dalam titah perasmian baru-baru ini. Kaola dari Kementerian Hal Ehwal Ugama dan Majlis Ugama Islam, insya Allah akan menyertakan beberapa Ahli-Ahli Yang Berhormat dalam beberapa jawatankuasa yang ada kaitannya dengan orang ramai iaitu bidang Zakat, Waqaf dan Baitul Mal; bidang Haji dan Umrah; bidang Hal Ehwal Masjid, bidang-bidang Pelajara Ugama, dan bidang Dakwah, insyaa Allah.

Sebelum mengakhiri ucapan penangguhan ini kaola sukacita menyampaikan tahniah dan penghargaan kepada Yang Mulia Puan Jurutulis Majlis dan Pemangku Jurutulis Majlis. Meski pun baharu dalam tugas masing-masing namun kedua-duanya berjaya dalam membantu Yang Berhormat Pehin selaku Yang Dipertua dan abis kaola Ahli-Ahli Majlis ini bagi sama-sama melicinkan urusan dan perjalanan majlis

dengan baik dan berjaya. Demikian juga kepada semua peringkat pegawai-pegawai tetap Jabatan Majlis Mesyuarat Negara dan pegawai-pegawai yang ditugaskan dari beberapa buah kementerian.

Kaola akhiri dengan doa semoga Allah Subhanahu wa Ta'ala memberkati sekalian kita dengan limpahan rahmat kasih sayang-Nya, dengan dilanjutkan usia dalam keadaan sihat dan bahagia, istiqamah mengibadati-Nya sambil bermuhibbah sesama kita manusia makhluk dan hamba-Nya.

Sekian.

وبالله التوفيق والهداية
والسلام عليكم ورحمة الله وبركاته

- Pehin Udana Khatib Dato Paduka Seri Setia Ustaz
Haji Awang Badaruddin bin Pengarah Dato Paduka
Haji Awang Othman,
Menteri Hal Ehwal Ugama.

Daraina – 8, Sungai Besar, Km 13
Jln Kota Batu, Brunei. BD 2517.